


陽春白雪附外集  
二





陽 春 白 雪

附 外 集

(二)

趙 聞 禮 選

# 陽春白雪卷第四

暗香

姜堯章

辛亥之冬予載雪詣石湖止既月授簡索句且徵新聲作此兩曲石湖把玩不已使工妓隸習之音節諧婉乃命之日暗香疎影仙呂宮

舊時月色。算幾番照我。梅邊吹笛。喚起玉人。不管清寒與攀摘。何遜如今漸老。都忘却。春風詞筆。但怪得。竹外疎花。香冷入瑤席。江國。正寂寂。歎寄與路遙。夜雪初積。翠尊易泣。紅萼無言耿相憶。長記曾攜手處。千樹壓。西湖寒碧。又片片。吹盡也。幾時見得。

疎影

前人

苔枝綴玉。有翠禽小小。枝上同宿。客裏相逢。籬角黃昏。無言自倚修竹。昭君不慣胡沙遠。但暗憶。江南江北。想珮環。月夜歸來。化作此花

幽獨。猶記深宮舊事。那人正睡裏。飛近蛾綠。莫似春風。不管盈盈。早與安排金屋。還教一片隨波去。又却怨、玉龍哀曲。等恁時、再覓幽香。已入小窗橫幅。

桂枝香

張宗瑞

梧桐雨細。漸滴作秋聲。被風驚碎。潤逼衣篝。線裊蕙鑪沈水。悠悠歲月天涯醉。一烟秋、一分憔悴。紫簫吹斷。素箋恨切。夜寒鴻起。又何苦、淒涼客裏。負草堂春綠。竹溪空翠。落葉西風。吹老幾番塵世。從前諳盡江湖味。聽商歌、歸興千里。露侵宿酒。疎簾淡月。照人無寐。

鶯歌序

高疎寮

屈原九歌東皇太一。春之神也。其詞悽惋。合意無盡。略采其意以度春曲。

青旂報春來了。玉鱗鱗風旌。陳瑤席。新奏琳琅。窈窕來薦嘉祉。桂酒洗瓊芳。麗景暉暉。日夜催紅紫。湛青陽新沐。人聲澹蕩花裏。光汎

崇蘭。坼遍桃李。把深心料理。共攜手。蘅室蘭房。奈何新恨如此。對佳  
時。芳情脈脈。眉黛蹙。羞奪瓊珥。折微馨。聊寄相思。莫愁如水。青蘋  
再轉。淑思菲菲。春又過半矣。細雨濕香塵。未曉又止。莫教一鴉無聊。  
羣芳疊疊。傷情漠漠。淚痕輕洗。曲瓊柱。帳流蘇暖。望美人。又是論千  
里。佳期杳渺。香風不肯爲媒。可堪玩此芳芷。春今漸歇。不忍零花。  
猶戀餘綺。度美曲。造新聲。樂莫樂此新知。思美人兮。有花同倚。年華  
做了。功成如委。天時相代。何日已。悵春功。非與他時比。殷勤舉酒酬  
春。春若能留。口還亦喜。

蘭陵王

高賓王

鳳簫咽。花底寒輕夜月。蘭堂靜。香霧翠深。曾與瑤姬恨輕別。羅巾淚  
暗疊。情入。歌聲怨切。殷勤意。欲去又留。柳色和愁爲重折。十年迴  
淒絕。念髻怯瑤簪。衣褪香雪。雙鱗不度烟江闊。自春來人見。水邊花

外。羞倚東風翠袖怯。正愁恨時節。南陌阻金勒。甚望斷青禽。難倩紅葉。春愁欲解。丁香結。整新歡羅帶。舊香官篋。淒涼風景。待見了。盡向說。

賀新郎

劉改之

老去相如倦。向文君、說似而今。怎生消遣。衣袂京塵曾染處。空有香紅尙軟。料彼此、魂消腸斷。一枕新涼眠客舍。聽梧桐、夜雨秋聲顫。燈暈冷。記初見。樓高不放珠簾捲。晚妝殘、翠鈿狼藉。淚痕凝臉。人道愁來須殢酒。無奈愁多酒淺。但寄恨、焦琴紈扇。莫鼓琵琶江上曲。怕荻花、楓葉俱淒怨。雲萬疊。寸心遠。

又

同前

水浴芙蓉淨。護濃香、遲開半斂。靚妝臨鏡。長憶耶溪薰風裏。年少紅顏照映。夜露冷、酒隨香醒。回首當時同舟侶。爲相思、怕折瓊瑤柄。千

萬縷意難罄。玻璃三萬六千頃。洗精神、塵埃盡絕。忽然端整。浪蕊年來都慵問。愛此濃情淡性。待移種、雲根玉井。太一真人今何在。取高花、十丈供烟艇。來伴我、泛清影。

右改之荷花辭。予得于王樂道家所藏墨蹟。愛其老手飄然塵外。恐與深山大澤俱埋。特拈出以示識者云。

又

贈建康鄭玉脫籍

劉叔儼 仙倫

鄭玉非娼女。歎塵緣、未了依然。被春留住。腸斷胭脂坡下路。有甚心情意緒。生怕入、梨園歌舞。寂寞陽臺雲雨散。算人間、誰是吹簫侶。空買斷、兩眉聚。新來鏡裏驚如許。暗傷懷、柳老花殘。幾番春暮。事逐孤鴻人已去。月落千山杜宇。念修竹、天寒何處。不戀玉窗并繡戶。妾從前、薄命甘荆布。誰爲作、解條主。

徵招

張宗瑞

飛鴻又作秋空字。淒淒舊遊湘浦。涼思帶愁深。渺蒼茫何許。歲華知幾度。奈雙鬢、不禁吟苦。獨倚危樓。葉聲搖暮。玉欄無語。尺素欲傳將。故人遠。天涯屢驚回顧。心事只琴知。漫閒相爾汝。甚時江海去。算空負。白蘋鷗侶。更誰與、翦燭西窗。且醉聽山雨。

角招

趙虛齋

曉寒薄。苔枝上、剪成萬點冰萼。暗香無處著。立馬斷魂。晴雪籬落。橫溪略約。恨寄驛、音書遼邈。夢遶揚州東閣。風流舊日何郎。想依然林壑。離索。引杯自酌。相看冷淡。一笑人如削。水雲寒漠漠。十萬遊仙。同驂霜鶴。幾多幽約。正月滿、瑤臺珠箔。夢斷闌干寂寞。盡分付許多愁。城頭角。

八寶妝

吳夢窗

夢醒芙蓉。風簷近、渾疑佩玉丁東。翠微流水。都是惜別行蹤。宋玉秋



花相比瘦。賦情更苦。似春濃。小黃昏。紺雲暮合。不見征鴻。宜城當時放客。認燕泥舊迹。返照樓空。夜闌心事。燈外敗壁哀蛩。江寒夜楓怨落。怕流作。題情腸斷紅。行雲遠。料澹蛾人在。秋香月中。

氏州第一

劉天游

冰縮寒流。川凝凍靄。前迴鷺渚。冬晚。燕閣紅鑪。馳峯翠釜。曾憶花柔酒軟。雲海滄洲。甚又寄、南來客鴈。灑雪朱門。回撓剡曲。鏡華霜滿。萬里銀霄凝望眼。恁吟袖、畫闌空暖。樹帶潮墟。笳鳴古戍。簇仲宣幽怨。想愁思、春近也。隨宮繡、時寬一線。昨夜扁舟。夢湖山、眉橫黛淺。

齊天樂

史邦卿

鬪千只在鷗飛處。年年怕吟秋興。斷浦沈雲。空山擲雨。中有詩愁千頃。波聲未定。望舟尾拖涼。渡頭籠暝。正好登臨。有人歌罷翠簾冷。悠然魂墮故里。奈閒情未了。還被吹醒。拜月虛簷。聽蛩壞砌。誰復能

憐嬌俊。憂心耿耿。寄桐葉芳題。冷楓新詠。莫遣秋聲。樹頭喧夜永。

又

高賓王

碧雲缺處無多雨。愁與去帆俱遠。倒葦沙閒。枯蘭澹冷。寥落寒江秋  
晚。樓陰縱覽。正魂怯清吟。病多依黯。怕揖西風。袖羅香自去年減。  
風流江左久客。舊遊得意處。珠簾曾捲。載酒春情。吹簫夜約。猶憶玉  
嬌香怨。塵樓一作樓。故苑。歎壁月空簷。夢雲飛觀。送絕征鴻。楚峯烟數  
點。

又

游胡園  
書感

翁時可

曲廊連苑吹笙道。重來暗塵都滿。種石生雲。移花帶月。猶欠藏春庭  
院。年年過眼。便梅謝蘭銷。舞沈歌斷。露井寒蛩。爲誰清夜訴幽怨。  
人生樂事最少。有時得意處。光陰偏短。樹色凝紅。山眉弄碧。不與朱  
顏相戀。臨風念遠。歎蝶夢難追。鷺盟重換。一片斜陽。送人歸騎晚。

又

吳君特

烟波桃葉西陵渡。十年斷魂潮尾。古柳重攀。輕鷗敘別。陳迹危亭獨倚。涼颼乍起。渺烟積飛帆。暮山橫翠。但有江花。共臨秋鏡照憔悴。華堂燭暗送客。眼波回盼處。芳豔流水。素骨凝冰。柔葱蘸雪。猶憶分瓜深意。清尊未洗。夢不濕行雲。漫沾殘淚。可惜秋宵。亂蛩疎雨裏。

玲瓏四犯

李肩吾

子我號濱洲

初撥琵琶。未肯信。知音真個稀少。盡日芳情。縈繫玉人懷抱。須待化作楊花。特地過舊家池沼。想綺窗刺繡。遲口半縷。茜茸微繞。舊時眉嬾貪相惱。到春來。爲誰濃掃。新歸燕子。都會識。不敢教知道。長是倦出繡幙。向夢裏。重謀一笑。怎得同攜手。花堵月地。把愁勾了。

八聲甘州

秋登靈巖

吳夢隱

渺空烟四遠。是何年。青天墜長星。幻蒼崖雲樹。名娃金屋。殘霸宮城。

箭逕酸風射眼。膩水染花腥。時鞞雙鴛響。廊葉秋聲。宮裏吳王沈醉倩。五湖倦客。獨釣醒醒。問蒼天無語。華髮奈山青。水涵空。闌干高處。送亂鴉。斜日落漁汀。連呼酒。上琴臺去。秋與雲平。

又過松江

馮深居

買扁舟載月。過長橋。回首夢耶非。問往日三高。清風萬古。繼者伊誰。惟有茶烟輕颺。零露濕菰絲。西子知何處。鴻怨蛩悲。遙想家山好在。正倚天青壁。石瘦雲肥。甚拋奇驪秀。猿鶴互猜疑。歸去好。散人相國。迴升沈。畢竟總塵泥。須還我。松間舊隱。竹上新詩。

宴山亭

張功甫

幽夢初回。重陰未開。曉色吹成疎雨。竹檻氣寒。蕙畹聲搖。新綠暗通南浦。未有人行。纔半啓。迴廊朱戶。無緒。空望極。霓旌錦書難據。苔徑追憶曾遊。念誰伴秋千。綵繩芳柱。犀奩黛捲。鳳枕雲孤。應也幾番

凝竚。怎得伊來。花霧繞。小堂深處。留住。直到老。不教歸去。

水龍吟

曾純甫

楚天千里無雲。露華洗出秋容淨。銀蟾臺榭。玉壺天地。參差桂影。鴛瓦寒生。畫簷光射。碧梧金井。聽昭華半夜。江梅三弄。風嫋嫋。良宵永。攜手西園宴罷。下瑤臺。醉魂初醒。吹簫仙子。驂鸞歸路。一襟清興。鵲鵲樓高。建章門迴。星河耿耿。看滄江潮上。丹楓葉落。浸關山冷。

又

登惠山  
酌泉

吳夢旸

豔陽不到青山。古陰冷翠成秋苑。吳娃點黛。江妃擁髻。空濛遮斷。樹密藏谿。草深迷市。峭雲一片。二十年舊夢。輕鷗素約。霜絲亂。朱顏變。龍吻春霏玉濺。煮銀瓶。羊腸車轉。臨泉照影。清寒沁骨。客塵都浣。鴻漸重來。夜深華表。露零鶴怨。把閒愁換與。樓前晚色。棹滄波遠。

滿江紅

岳肅之

小院深深。悄鎖日、陰晴無據。春未足、閨愁難寄。琴心誰與。曲徑穿花尋蛺蝶。虛欄傍日教鸚鵡。笑十三、楊柳女兒腰。東風舞。雲外月。風前絮。情與恨。長如許。想綺窗今夜。爲誰凝竚。洛浦夢回留珮客。秦樓聲斷吹簫侶。正黃昏、時候杏花寒。廉纖雨。

錦堂春 七夕

王聖與

桂嫩傳香。榆高送影。輕羅小扇涼生。正鴛機梭靜。鳳渚橋成。穿線人來月底。曝衣花入風庭。看星殘罨碎。露滴珠融。笑掩雲肩。綵盤凝望。仙子但三星隱隱。一水盈盈。暗想憑肩私語。鬢亂釵橫。蛛網飄絲。胃恨。玉籤傳點催明。算人間待巧。似恁匆匆。有甚心情。

滿江紅 茶蘼

趙德莊

千種繁春。春已去、翩然無迹。誰信道、茶蘼枝上。靜中留得。曉鏡洗妝非粉白。晚衣弄舞餘衫碧。粲寶釧、珠珥不勝持。濃陰夕。金翦度。還

堪惜。霜蝶睡。無從覓。知多少。好辭清夢。釀成冰骨。天女散花無酒聖。仙人種玉慙香德。悵攀條。記得鬢絲青。東風客。

念奴嬌

郭從範

光風轉蕙。泛崇蘭漠漠。滿城飛絮。金谷樓危山共遠。幾點亭亭烟樹。枝上殘花。胭脂滿地。亂落如紅雨。青春將暮。玉簫聲在何處。無端天與娉婷。簾鉤鸚鵡。夢斷聞殘語。玉骨瘦來無一把。手挹羅衣看取。江北江南。靈均去後。誰采蘋花與。香銷雲散。斷魂分付潮去。

水龍吟

丁基仲

鴈風吹裂雲痕。小樓一線斜陽影。殘蟬抱柳。寒蛩入戶。淒音忍聽。愁不禁秋。夢還驚客。青鐙孤枕。未更深。早是梧桐泣露。那堪度。蘭宵永。空歎銀瓶罍一作金井。醉鄉醒。溫柔鄉冷。征塵倦撲。閒花漫舞。何心管領。葱指冰絃。蕙懷春錦。楚梅風韻。恨芙蓉城杳。藍雲依黯。鎖巫峯

暝。

木蘭花慢

劉隨如

看纖雲護月。湛河漢。夜聲收。正玉塵生風。銀牀墜露。涼葉颼颼。襟懷  
靜吞八表。莫登山。臨水易驚秋。閒想多情宋玉。舊來空替人愁。溫  
柔鄉解。口秋。口絲竹。閒秦謳。向橙橘香邊。持螯把酒。聊伴清遊。騷人  
自應念遠。與黃花。評泊晉風流。明日蒹鱸興動。待尋江上歸舟。

念奴嬌

秋感 娘

蔡伯堅

請閒

念奴玉立。記連昌宮裏。春風相識。雲海茫茫人換世。幾度梨花寒食。  
華萼霓裳。沈香水調。一串驪珠濕。九天飛上。叫雲遏斷箏笛。老子  
陶寫平生。清音裂耳。覺庾愁都釋。澹澹長空今古夢。只有此聲難得。  
湓浦心情。落花時節。還對天涯客。春溫玉斝。一聲洗盡冰雪。

又

前人



棋聲特地。把十年春夢。恍然驚覺。楊柳樓心歌舞地。曾寄一枝柔弱。翠幌重來。玉環不見。鸚鵡言猶昨。秦箏別後。知他幾換弦索。前度顧曲周郎。尊前重見。千種愁難著。猶勝元都人去後。空怨殘紅零落。綠葉成陰。桃花貪子。枉恨東風惡。盈盈淚眼。向人欲下還閣。

瑞鶴仙

俞國寶

春衫和淚著。又燕入江南。鴈歸衡岳。東風曉來惡。遶西園無緒。淚隨花落。愁鐘恨角。夢無憑。難成易覺。到春來易感。韓香頓減。沈腰如削。離索。挑鐙占信。聽鶻求音。不禁春弱。雲輕雨薄。陽臺遠。信難託。念盟釵一股。鸞光兩破。已負秦樓素約。但莫教嫩綠成陰。把人誤却。

又

吳夢應

晴絲牽緒亂。對滄江斜日。花飛人遠。垂楊暗吳苑。正旗亭烟冷。河橋風暖。蘭情蕙暝。惹相思。春根酒畔。又爭知。吟骨縈銷。漸把舊衫重翦。

淒斷。流紅千浪。缺月孤樓。總難留燕。歌塵凝扇。待憑信。拚分鈿。試  
挑鐙欲寫。還依不忍。牋幅偷和淚捲。記殘雲。剩雨蓬萊。也應夢見。

青房並蒂蓮

王聖與明本誤附  
美成集後

醉凝眸。是楚天秋曉。湘岸雲收。草綠蘭紅。淺淺小汀洲。芰荷香裏鴛  
鴦浦。恨菱歌、驚起眠鷗。望去帆、一片孤光。棹聲伊軋。櫓聲柔。愁窺  
汴隄翠柳。曾舞送當時。錦纜龍舟。擁傾國、纖腰皓齒。笑倚迷樓。空令  
五湖夜月。也羞照、三十六宮秋。正朗吟、不覺回撓。水花楓葉兩悠悠。

錦堂春 中秋

前人

露掌秋聲。花籤漏永。那堪此夕新晴。正纖塵飛盡。萬籟無聲。金鏡開  
奩弄影。玉壺盛水侵稜。縱簾斜樹隔。燭暗花殘。不礙虛明。美人凝  
恨歌黛。念經年間阻。只恐雲生。早是宮鞋鴛小。翠鬢蟬輕。蟾潤妝梅  
夜發。桂熏仙骨香清。看姮娥此際。多情又似無情。

念奴嬌 涼聖觀

奚秋厓

踏破秋痕。向虛堂細問。新涼蹤跡。野客從來無管領。獨鶴自還空碧。紅日重開。翠華曾到。應恨湖光窄。游龍別後。兩山依舊南北。無語野草閒花。似嗔人問。萬事今非昔。古木蒼烟無限意。只有吟魂知得。歌舞百年。是非一醉。未必西風識。浩歌歸去。滿船風雨淒惻。

長相思慢

前人

日折霜簷。寒欺霧幕。晴枝淺弄春華。驚回綺夢。獨擁綾衾。腮痕微印朝霞。倦起心情。念風移霜換。依舊天涯。鴈影水雲斜。算相思、一點愁賒。問橘楚橙吳。舊香猶在。別後襟袖輸他。琴心知未許。想鈿釵、流落誰家。怕上高樓。歸思遠、斜陽暮鴉。幾多年、江湖浪識。知心只許梅花。

清平樂

山谷

春歸何處。寂寞無行路。若有人知春去處。喚取歸來同住。春無蹤跡誰知。除非問取黃鸝。百轉無人能解。因風飛過薔薇。

又

朱希真

春寒雨妥。花萼紅難破。繡線金針慵不作。要見秋千無那。西鄰姊妹丁甯。尋芳更約清明。畫箇丙丁帖子。前街後院求晴。

又

徐山民

綠園紅遶。一枕屏山曉。怪得今朝偏起早。笑道牡丹開了。迎人捲上珠簾。小螺未拂眉尖。貪教玉籠鸚鵡。楊花飛滿妝奩。

又

孫花翁

秋娘窗戶。夢入陽臺雨。小別殷勤留不住。恨滿飛花落絮。一天曉月簷西。馬嘶風拂羅衣。分付許多風致。送人行下樓兒。

又

趙退齋 汝菴

錦屏香褪。寒隱輕衫嫩。燕子護泥飛不穩。庭掩百花難認。雙雙繡帶微風。海棠此夜簾櫳。愁顏一番寒食。小窗淡月殘紅。

又

石瑤林

香搖穗碧。梅巧紅酥滴。雲旆寶釵蟬隊翼。嬌小爭禁酒力。繡窗芳思遲遲。無端又斂雙眉。貪把蘭亭學字。一冬忘了彈棋。

又

後山

秋聲隱地。葉葉無留意。冰簟光流團扇墜。驚起雙棲燕子。夜堂簾合回廊。風帷吹亂凝香。臥看一庭明月。曉衾不耐初涼。

又

俞國寶

數聲烏鵲。院宇寒蕭索。楊柳梢頭秋過却。無葉可供風落。可人猶有笑渠。向人冷澹妝梳。雲外征鴻過盡。夕陽依舊平蕪。

又

徐抱獨

風韶雨秀。春已平分後。陡頓故人疎把酒。閒凭畫闌搔首。爭須攜  
手踏青。人生幾度清明。待得燕慵鶯嬾。楊花點點浮萍。

又

許忱甫

鳳雙鸞偶。天上人間有。簷玉無聲花影瘦。夜淺春濃時候。別來幾  
度寒宵。六橋風月迢迢。鏡下有誰相伴。一方紅濕鮫綃。

又

張宗瑞

新涼窗戶。閒對琴言語。彈到無人知得處。兩袖五湖風雨。坐中斗  
轉參橫。珠躔碎落瑤觥。憶著故山蘿月。今宵應爲誰明。

又

羅子遠

明虹收雨。兩漿能吳語。人在江南荷葉浦。採得蘋花無數。夢中舞  
燕棲鸞。起來烟渚風灣。一點愁眉天末。憑誰剗却春山。

阮郎歸

周紫芝 少隱

月櫺疎影照嬋娟。閒臨小玉盤。棗花金釧出纖纖。碁聲敲夜寒。飛  
電冷。水晶圓。夜深人未眠。笑催鑪獸煖衾鴛。莫教銀漏殘。

又

徐道暉

綠楊庭戶靜沈沈。楊花吹滿襟。晚來閒向水邊尋。驚飛雙浴禽。  
別後。忍重臨。暮寒天氣陰。妾心移得在君心。方知人恨深。分

又

孫季繁

滿階紅影月昏黃。玉鑪催換香。碧窗嬌困懶梳妝。粉沾金縷裳。鸞  
髻聳。黛眉長。燭光分兩行。許誰騎鶴上維揚。溫柔醉鄉。

又

翁寶暘

月高樓外柳花明。單衣怯露零。小橋鐙影落殘星。寒烟蘸水萍。歌  
袖窄。舞鬟輕。梨花夢滿城。落紅啼鳥兩無情。春愁添曉醒。

菩薩蠻

翁時可

元龍  
號處靜

春心莫共花爭發。花開不管連環缺。夢斷小樓空。杜鵑啼曉紅。眼  
看連理樹。纖手移箏柱。調徧錯成聲。無人知此情。

又

前人

玉纖閒捻花間集。赤闌干對芭蕉立。薤葉晚生涼。竹陰移小牀。拗  
蓮牽藕線。藕斷絲難斷。彈水沒鴛鴦。教尋波底香。

好事近

汴京賜宴有感  
教坊樂有感

韓南澗

凝碧舊池頭。一聽管絃淒切。多少梨園聲在。總不堪華髮。杏花無  
處避春愁。也傍野烟發。唯有御溝聲斷。似知人嗚咽。

又

雷北湖

梅片作團飛。雨外柳絲金濕。客子短篷無據。倚長風挂席。回頭流  
水小橋東。烟掃畫樓出。樓上有人凝竚。似舊家曾識。

又

劉小山



花底一聲鶯。花上半鉤斜月。月落鶯啼何處。點飛英如雪。東風吹盡去年愁。解放丁香結。驚動小亭紅雨。舞雙雙金蝶。

浪淘沙

吳雲壑

居父

雲葉弄輕陰。屋角鳩鳴。青梅著子欲生仁。冷落江天寒食雨。花事闌情。池館晝盈盈。人醉寒輕。一川芳草只銷凝。時有入簾新燕子。明日清明。

又

韓子晔

莫上玉樓看。花雨斑斑。四垂羅幙護朝寒。燕子不知人去也。飛認闌干。回首幾關山。後會應難。相逢祇有夢魂間。可奈夢隨春漏短。不到江南。

又豐樂樓

裙色草初青。鴨綠波輕。試花霏雨濕春晴。三十六梯人不到。獨喚瑤

箏。艇子憶逢迎。依舊多情。朱門只合鑲娉婷。却逐彩鸞歸去路。香陌春城。

醉落魄

范至能

雪晴風作。松梢片片輕鷗落。玉樓天半褰珠箔。一笛梅花吹裂凍雲幕。去年小獵漓山脚。弓刀濕遍猶橫槊。今年翻怕貂裘薄。寒似去年。人比去年覺。

又

院姬口主出爲成  
婦○夢悶寫不載

吳夢旼

柔懷難託。老天如水人情薄。燭痕猶刻西窗約。歌斷梨雲留夢遶羅幙。寒更唱徧吹梅角。香銷臂趁弓弰削。主家衣在羞重著。獨掩營門。春盡柳花落。

謁金門

盧申之

風不定。移去移來簾影。一雨林塘新綠淨。杏梁歸燕並。翠袖玉屏

金鏡。薄日綺疏人靜。心事一春疑酒病。鳥啼花滿徑。不藉江詞載。

浣溪沙

郭從範

幾點胭脂印指紅。一雙蛾綠斂眉濃。夜寒綃帳燭花融。 賸炷龍涎  
熏骨冷。旋調銀液鎖心忪。整鬟羞顧半嬌慵。

清平樂

周紫芝

青春欲暮。柳下將飛絮。月到階前梅子樹。啼得杜鵑飛去。 人歸不  
掩朱門。一成過了黃昏。只有瑣窗紅蠟。照人獨自銷魂。

又

李仲鎮

亂雲將雨。飛過鴛鴦浦。人在小樓空翠處。分得一襟離緒。 片帆隱  
隱歸舟。天邊雪卷雲浮。今夜夢魂何處。青山不隔人愁。

春光好

張才父

烟澹澹。雨濛濛。水溶溶。帖水落花飛不起。小橋東。 翩翩怨蝶愁蜂。

遠芳叢。戀餘紅。不恨無情橋下水。恨東風。

點絳脣

姜堯章

金谷人歸。綠楊低掃。吹笙道。數聲啼鳥。也學相思調。  
送劉郎老。淮南好。甚時重到。陌上生春草。

月落潮生。掇

又

史邦卿

花落苔香。斷無人肯行。鵝鶩。晚風翻繡。吹醒東窗酒。  
月知人瘦。香銷後。亂愁依舊。閒損胡酥手。

獨臥氈氍明

又

馮可遷

秋滿孤篷。翠蒲紅蓼。留人住。一簾香縷。邊影驚鴻度。  
事新情緒。憑誰訴。蠟燈犀塵。擬共西風語。

小據胡牀。舊

又

吳君特

時霎清明。載花不過西湖路。嫩陰綠樹。正是春留處。

燕子重來。往

事東流去。征衫貯。舊寒一縷。淚濕風簾絮。

又

趙野雲

又是年時。冷烟寒食。梨花院。柳金拖線。一曲珠歌轉。

翠碧雕梁。風軟簾通燕。何須勸。酒豪詩健。逸韻今重見。

浣溪沙

辛亥正月二十四日發合肥

姜堯章

釵燕籠雲晚不忺。擬將裙帶繫郎船。別離滋味又今年。

楊柳夜寒猶自舞。鴛鴦風急不成眠。此兒閒事莫縈牽。

又

王輔道

扇影輕搖一線香。斜紅初過晚來妝。嬌多無事做淒涼。

借問誰教春易老。幾時能勾夜何長。舊歡新恨總思量。

卜算子

蘭

曹元寵

松竹翠蘿寒。遲日江山暮。幽徑無人獨自芳。此恨憑誰訴。似共梅

花語。尙有尋芳侶。著意聞時不肯香。香在無心處。

又

俞國寶

剪燭寫香牋。撥火溫寒醖。門外東風將我愁。欲作三更雨。夜夜玉樓心。日日長亭路。荳蔻花開信不來。塵滿金釵股。

浪淘沙

吳雲壑 居父

岸柳可藏鴉。路轉溪斜。忘機鷗鷺立汀沙。咫尺鍾山迷望眼。一半雲遮。臨水整烏紗。兩鬢蒼華。故鄉心事在天涯。幾日不來春便老。開盡桃花。

採桑子

張武子

佳人滿勸金蕉葉。夜玉春溫。別後黃昏。燕子樓高月一痕。年年依舊梨花雨。粉淚空存。流水孤村。不著寒鴉也斷魂。

踏莎行

謝明遠

楚樹芊絲。江雲蕪漫。曉風吹墮梅千片。驚禽飛去響春空。平沙月落  
光零亂。人意傷離。物華驚換。武夷此去如天遠。臨分爲我少留連。  
柳條獨在江南岸。





# 陽春白雪卷第五

瑞龍吟

清明日  
觀競渡

吳君特

大溪面。遙望繡羽衝烟。錦梭飛練。桃花三十六陂。鮫宮睡起，嬌雷乍轉。去如箭。催趁戲旗游鼓。素瀾雪濺。東風冷濕蛟腥。澹陰送晝，輕霏弄晚。洲上青蘋生處。鬪春不管。懷沙人遠。殘日半開。一川花影零亂。山屏醉纈。連棹東西岸。闌干倒、千紅妝靨。鉛香不斷。傍暝疎簾捲。翠漣縹淨。笙歌未散。簪柳門歸懶。猶自有、玉龍黃昏吹怨。重雲暗閣。春霖一片。

龍山會

南豐  
登高

趙虛齋

重整登高屐。羣玉峯頭。萬里秋無極。遠山青欲滴。新鴈過、縹緲孤雲天北。烟入小橋低。水痕退、寒流澄碧。對佳辰、驚心客裏。鬢絲堪摘。

風流晉宋諸賢。騎省龍山。俛仰皆陳迹。憑闌看落日。嗟往事。惟有黃  
花如昔。醉袖舞西風。任教笑。參差鳧鳥。但回首。東籬久負。有誰知得。

秋霽

盧蒲江

虹雨纔收。正抱葉殘蟬。漸老雲木。銀漢飛星。玉壺零露。萬里素秋如  
沐。倚顰抱獨。盼嬌曾記郎心目。向豔歌。偏愛賦情多處。寄衷曲。淒  
涼漫有舊月闌干。夜涼無因。重照顏玉。扇紈收。鸞孤蠹損。一番愁緒  
暗相觸。回首塞雲空。鴈足。露井零亂。已是負了桐陰。可堪輕誤。滿籬  
種菊。蒲江詞不  
載此闕。

金盞子 水仙

趙虛齋

得水能仙。向漢皋遺珮。碧波涵月。藍玉暖生烟。稱綳袂黃冠。素姿冰  
潔。亭亭獨立風前。奈香多愁絕。當時事。琴心妙處難傳。有誰堪說。  
歲晚渺無人。更短景繁雲。天欲雪。瀟湘烟水茫茫。但萬里相思。寒江

空闌。殷勤折向梅邊。聽玉龍吹徹。丁寧道。百年兄弟。相看晚節。此詞與他詞同本不

孤鸞梅

前人

江南春早。問江上寒梅。占春多少。幾點寒星細。萬里春風到。幽香不知甚處。但迢迢。滿汀烟草。回首誰家。竹外有一枝斜好。記當年。曾共花前笑。念玉雪襟期。有誰知道。喚起羅浮夢。正參橫月小。淒涼更吹塞筦。漫相思。鬢華驚老。待覓西湖半曲。對霜天清曉。

高陽臺 落梅

吳夢旼

宮粉雕痕。仙雲墮影。無人野水荒灣。古石埋香。金沙鎖骨連環。南樓不恨吹橫笛。恨曉風。千里關山。半飄零。庭院黃昏。月冷闌干。壽陽空理愁鸞。問誰調玉髓。暗補香瘢。細雨歸鴻。孤山無限春寒。離魂難倩。招清此。夢縞衣。解珮溪邊。最愁人。啼鳥清明。葉底青圓。

玉漏遲

和趙立之

林玉谿

表民

並湖遊冶路。垂隄萬柳。麴塵籠霧。草色將春。離思暗傷南浦。舊日惜  
惜坊陌。尙想得。畫樓窗戶。成遠阻。鳳箋空寄。燕梁何許。淒涼瘦損  
文園。記翠筦聯吟。玉壺通話。事逐征鴻。幾度悲歡休數。鶯醉亂花深  
裏。悄難替。愁人分訴。空院宇。東風晚來吹雨。

又

史蘂泉

綠樹深庭院。侵簾暝草。沿砌幽蘚。問訊餘芳。糝徑碎紅千點。暗有芹  
香墮几。認杏棟。營巢新燕。晴思軟。春光幾許。費人裁翦。梅陰地濕  
無塵。但密袖薰虬。靜看詩卷。半掬羈心。似翠蕉難展。花事因循過了。  
漸愁入。薰風團扇。屏晝掩。屏上數峯青遠。

後段第五句作  
五字與諸家異

倦尋芳

張荃翁

端義

曉聽社雨。猶帶餘寒。尙侵襟袖。插柳千門。相近禁烟時候。鬢墜搔頭

深舊恨。臂寬條脫添新瘦。卷重簾。看雙飛燕羽。舞庭花畫。誰共語。  
春來怕酒。一段情懷。燈暗更後。罨畫屏山。今夜夢魂還又。愁墨題牋。  
魚浪遠。粉香染淚。絞綃透。待相逢。想鴛衾。鳳幃依舊。

念奴嬌

李草堂

鏡鸞分影。望天涯。腸斷。悄無紅葉。幾度秋風吹翠被。一縷幽香難滅。  
燕卜新梁。花移別檻。回首春如客。歡情何在。綠楊空鎖愁色。可是  
今古風流。小喬姝麗。只許周郎得。金谷珠簾空百尺。不礙夢魂飛入。  
釵股盟深。舊緣未斷。月有重圓日。藍橋路近。乘雲先問消息。

風流子

王樂道

咏和

東風長是客。簾櫳靜。燕子一雙飛。看花塢日高。翠陰護曉。柳塘風細。  
綠漲浮漪。腸斷處。渭城春樹遠。江國暮雲低。芳徑聽鶯。暗驚心事。畫  
檐聞鶻。試卜歸期。小樓凝竚地。疎窗下。幾度對說相思。記得菱花

交照素手曾攜。有新恨兩眉。向誰說破芳心一點。惟我偏知。休爲多情瘦却。重有來時。

喜遷鶯

馮深居

涼生遙渚。正綠芰擊霜。黃花招雨。鴈外漁村。蛩邊蟹舍。絳葉滿秋來路。世事不離雙鬢。遠夢偏欺孤旅。送望眼。但憑舷微笑。書空無語。慵覷。清鏡裏。十載征塵。長把朱顏污。借箸青油。揮毫紫塞。舊事不堪重舉。間闊故山猿鶴。冷落同盟鷗鷺。倦遊也。便檣雲拖月。浩歌歸去。

倦尋芳

翁時可

燕簾挂晚。鶯檻迷晴。花思零亂。試覓娉婷。日日傍湖亭苑。擲果牆陰窺駐馬。采香深逕。拋春扇。醉歸來。任釵雲半落。繡簾慵捲。念燦錦年華如舊。飛絮遊絲。縈恨難翦。蜀羽無情。早帶怨紅啼斷。厚約輕辭。寒食夜。行雲空口。梨花院。莫凭闌。正斜陽。澹烟平遠。

齊天樂

翁寶暘 孟寅

幽香不受春料理。青青尙餘秋鬢。礪曲岩隈。烟梳露浴。甘與菰蒲共  
隱。芳標幾迴。看纓結丁香。帶紫晴荇。恨水東流。楚江憔悴亂雲暝。  
淒涼夢遊故苑。縱妬花風暴。吹夢難醒。豔李妖桃。紆青佩紫。爭似廣  
文官冷。塵波萬頃。算誰是同心。自憐孤影。收斂風流。素絃清夜永。

齊天樂

前人

紅香十里銅駝夢。如今舊遊重省。節序飄零。歡娛老大。慵立燈光蟾  
影。傷心對景。怕回首東風。雨晴難準。曲巷幽坊。管絃一片笑聲近。  
飛棚浮動翠葆。看金釵半溜。春妬紅粉。鳳輦鰲山。雲收霧斂。迤邐銅  
壺漏迴。霜風漸緊。展一幅青綃。淨懸孤鏡。帶醉扶歸。曉醒春夢穩。

過秦樓 和美成韻

趙白雲 崇嶠

隱枕輕潮。拂塵疎雨。幽夢似真還斷。鶯雛燕婉。依約年時。花下試翻

歌扇。憔悴鬢怯春寒。慢掠輕絲。柳風如箭。甚陽臺渺邈。行雲無準。楚  
天空遠。應喚覺。當日琴心。祇今詩思。惆悵客衣塵染。釵留股玉。鞦  
襲鈎羅。荏苒膩寒香變。問訊多情。別後笑巧顰嬌。對誰長倩。但晚來  
江上。眼迷心想。越山兩點。

綠頭鴨

利碧澗 登

晚春天。柳絲初透晴烟。點離懷。綠房深處。豔遊曾記當年。襯龍綃。亭  
亭玉樹。步鴛褥。窄窄金蓮。燒蜜調蜂。翦花挑蝶。香雲微濕。綠彎鬟。嬉  
遊困。倚郎私語。還愛撫郎肩。共攜手。海棠院左。翡翠簾邊。恨無情。  
錦籠鸚鵡。等閒輕語花前。昔相憐。關山咫尺。今相望。咫尺關山。是妾  
心闌。是郎意懶。是郎無分妾無緣。都休問。金枝雲裏。何日跨金鸞。深  
盟在。香囊暗解。終值雙鴛。

漢宮春

九日登  
豐樂樓

王□□



手撚黃花對西風無語。雙鬢蕭蕭。韶華暗中過眼。零落心交。登臨把酒更誰伴。破橘持螯。惟只有湖邊鷗鷺。飛來如受人招。往事不禁重省。料館羅分鈿。翠減香銷。空向畫橋古樹。猶繫輕橈。西興渡口。誤歸帆。幾信寒潮。傷情處。淡烟殘照。倚闌人共秋高。

木蘭花慢

史蘖泉 深

畫樓簾半捲。倩誰覓。鳳簫音。記待月梅邊。籠香酒後。私語屏陰。忽忽佩珠暗解。斷歸鴻。消息兩沈沈。前度劉郎易老。舊時飛燕難尋。羅襟薄有淚痕侵。釵股暗黃金。向寶奩密看。綾箋小字。長是驚心。登臨漫勞眺遠。但青山。杳隔暮雲深。曾傍灣橋繫馬。紫騮嘶度平林。

畫錦堂 牡丹

黃玉泉

麗景融晴。浮光起晝。玉妃信意尋春。一笑酒盃翻手。滿地祥雲。寶臺豔豔文綃帕。郎官嬌舞鬱金裙。嫣然處。况是生香微濕。膩臉餘醺。

煖烘肌欲透。愁日炙還銷。風動成塵。細爲品歸雪調。度與朱唇。翠幃  
晚映真圖畫。金蓮夜照越精神。須拚醉。回首夕陽流水。碧草如茵。

隔浦蓮 荷花

前人

瑤妃香透襪冷。竚立青銅鏡。玉骨清無汗。亭亭碧波千頃。雲水搖扇  
影。炎天永。一國清涼境。晚妝靚。微酣不語。風流幽恨誰省。沙鷗少  
事。看到睡鴛雙醒。蘭棹歌遙隔浦應。催暝。藕絲縈斷歸艇。

洞仙歌

姑蘇舊臺在胥門上。次潘紫岩韻。

前人

吳宮故墅。是天開圖畫。縹緲層雲出飛榭。隱隱樓空翠巘。水繞蕪城。  
平疇迴。點染霜林彫謝。越來溪上鴈。聲切闌干。似覓胥門怨吳霸。  
屬鏤沈香溪斷。夢散雲空。千年外。等是漁樵閒話。但極目。荒臺鬱蒼  
烟。衰草裏。又還夕陽西下。

念奴嬌 題馬

程楚客 武

蜀江城遠。想連雲危棧。接天窮處。惆悵烟塵回首地。雙闕觚稜猶故。  
龍扈星聯。羽林風肅。未放鸞駢去。不堪掩面。淚沾宸袖如雨。底事  
當日昭陽。吹羌鳴羯。沈却霓裳舞。三十六宮春滿眼。曾把色嗔香妬。  
芳草埋情。飛花隕怨。翻被蛾眉誤。畫圖驚見。黯然魂斷今古。

聲聲慢

奚秋崖

秋聲浙瀝。楚棹吳鞭。相逢易老顏色。桐竹鳴騷。音韻水雲空覓。炎涼  
自今自古。信浮生、有誰禁得。漫回首。問黃花還念故人猶客。莫管  
紅香狼藉。蘭蕙冷、偏他露知霜識。木落山空。心事對秋明白。征衣暗  
塵易染。算江湖、隨人寬窄。正無據。看寒蟾、飛上暮碧。

花心動

泊舟四  
聖觀

史蘖泉

肌雪浮香。見梅花清姿。漫勞凝佇。淡粉最嬌。羞把春口。長記壽陽眉  
嫵。綠苔深逕尋幽地。誰相伴、凌波微步。翠鴛冷、芳塵路杳。舊遊何處。

不信重城閒阻。終沒箇因由。寄聲傳語。寶炬凝珠。綵筆呵冰。密寫斷腸新句。月寒烟暝。孤山下。羞吟口斷橋邊去。遮愁緒。丹青怎生畫取。

前段第四句後段第七句。原本俱少一字。應補。

### 齊天樂

王月山

夜來疎雨鳴金井。一葉舞空紅淺。蓮渚收香。蘭皋浮爽。涼思頓欺班扇。秋光萼萼。任老却蘆花。西風不管。清興難磨。幾回有句到詩卷。長安故人別後。料征鴻聲裏。畫闌凭徧。橫竹吹商。疎砧點月。好夢又隨雲遠。閒愁似綫。甚繫損柔腸。不堪裁翦。聽著鳴蛩。一聲聲是怨。

### 玉漏遲

趙立之

聞禮號釣月

絮花寒。食路晴絲。冒日綠陰吹霧。客帽欺風。愁滿畫船烟浦。綵柱秋千散後。悵塵鎖、燕簾鶯戶。從間阻。夢雲無準。鬢霜如許。夜永繡閣藏嬌。記掩扇傳歌。翦燈留語。月約星期。細把花鬚頻數。彈指一襟幽

恨。謾空倩啼鵲聲訴。深院宇。黃昏杏花微雨。

法曲獻仙音

前段末句三字。諸家俱屬下段作起句。

前 人

花匣么弦。象奩雙陸。舊日留歡情意。夢別銀瓶。恨裁蘭燭。香篝夜閒。鴛被。料燕子重來地。桐陰瑣窗綺。倦梳洗。蘭芳鈿自羞鴛鏡。羅袖冷。烟柳畫簾半倚。淺雨壓茶蘼。指東風。芳事餘幾。院落黃昏。怕春鶯。驚笑憔悴。倩柔紅約定。喚取玉簫同醉。

念奴嬌

柴仲山

春來多困。正日移簾影。銀屏深閉。喚夢幽禽。烟柳外。驚斷巫山十二。宿酒初醒。新愁半解。惱得成憔悴。鬢鬆雲鬢。不忺鸞鏡梳洗。門外滿地香風。殘梅零亂。玉糝蒼苔碎。乍暖乍寒。渾莫擬。欲試羅衣猶未。鬪草雕闌。買花深院。做踏青天氣。晴鳩鳴處。一池昨夜春水。

風流子

方君遇

春被雨禁持。傷心事、髣髴去年時。記芳徑暮歸。褪妝微醉。暗幃先寢。聞笑佯癡。回首別離容易過。楊柳又依依。紅燭怨歌。鬢花零落。青綾牽夢。屏影參差。桃源今何在。劉郎去。應念瘦損香肌。誤約夜闌。從前怪我多疑。但怕收殘淚。對人徐語。指彈新恨。推戶潛窺。還是慊慊病也。無計憐伊。

瑞鶴仙

趙立之

客邊情味惡。花漏遠、春靜風鳴鳳鐸。空梁燕泥落。映柔紅微冱。海棠簾箔。愁鐘恨角。怕催人、黃昏索寞。擁吟袍、凭煖闌干。醉怯冷香羅薄。阿鵲。幽芳月淡。紫曲雲昏。有人說著。名繯易縛。歸鞭杳、誤期約。計金泥卜晝。銀屏娛夜。彈指忽忽恨錯。爲情多、攬盡芳春。帶圍瘦覺。

又立春

前人

凍痕消夢草。又招得春歸。舊家池沼。園扉掩寒悄。倩誰將花信。偏傳

深窈。追遊趁早。便裁却春衫短帽。任殘梅飛滿溪橋。和月醉眠清曉。  
年少。青絲纖手。綵勝嬌鬟。賦情誰表。南樓信杳。江雲重。鴈歸少。記  
衝香嘶馬。流紅迴岸。幾度綠楊殘照。想暗黃。依舊東風。霸陵古道。

清夜遊

越調

周彥良

西園昨夜。又一番。闌風伏雨。清晨按行處。有新綠照人。亂紅迷路。歸  
吟窗底。但蛩几。留連春住。窺晴小蝶翩翩。等閒飛來似相妬。遲暮。  
家山信杳。奈錦字難憑。清夢無據。春盡江頭。啼鴉最悽苦。薔薇幾度  
花開。誤風前。翠樽誰舉。也應念。留滯周南。思歸未賦。

春歸怨

越調

前人

問春爲誰來爲誰去。忽忽太速。流水落花。夕陽芳草。此恨年年相觸。  
細履名園。閒看嘉樹。藹翠陰成簇。爭知也被韶華換却。詩人鬢邊綠。  
小花深院靜。旋引清尊。自歌新曲。燕子不歸來。風絮亂吹簾竹。誤

文姬凝望久。心事想勞頻卜。但門掩黃昏。數聲啼鴉。又喚起相思一掬。

齊天樂

儲華谷

東風一夜吹寒食。枝頭片紅猶戀。宿酒初醒。新吟未穩。凭久闌干留暖。將春買斷。恨苔經榆階。翠錢難貫。陌上秋千。相逢誰認舊時伴。輕衫粉痕褪了。絲緣餘夢在。良宵偏短。柳線經烟。鶯梭織霧。一片舊愁新怨。慵拈象管。待寄與深情。難憑雙燕。不似揚花。解隨人去遠。

瑞鶴仙

徐南溪

暮霞紅映沼。恨柳枝疎瘦。不禁風攪。投林數歸鳥。更枯莖敲荻。糝紅堆蓼。江寒浪小。鴈來多。音書苦少。試看盡。水邊紅葉。不見有詩流到。煩惱。凭闌人去。枕水亭空。路遙天杳。情深恨渺。無計訴與伊道。漏聲催。門外霜清風細。月色今宵最好。怎割捨。美景良時。等閒睡了。



又

陸景思 戲

濕雲黏鴈影。望征路愁迷。離緒難整。千金買光景。但疎鐘催曉。亂鴉啼暝。花棕暗省。許多情、相逢夢境。便行雲、都不歸來。也合寄將音信。孤迥。盟鸞心在。跨鶴程高。後期無準。情絲待剪。翻惹得、舊時恨。怕天教何處。參差雙燕。還染殘朱。賸粉對菱花、與說相思。看誰瘦損。

又用陸松韻。

黃澹翁 中

睡餘拋倦枕。憶篆鼎香銷。起來慵整。晴光破清冷。正柳黃梅淡。染金勻粉。茶甌雋永。試經行、桐花舊井。記前回、未綠鷗波。近日燕芹青盡。因省。春風如舊。人面何歸。對時傷景。樓高望迥。潮有信。鴈無準。任相如多病。沈郎全瘦。都沒音塵寄問。便做無、阿鵲頻頻。可能睡穩。

摸魚兒 海棠

劉後村

甚春來、冷烟淒雨。朝朝遲了芳信。驀然作暖晴三日。陡覺萬姝嬌困。

天怎忍。潘令老不成。沒個看花分。才情減盡。悵玉局飛仙。石湖絕筆。  
辜負這風韻。傾城色。懊惱佳人薄命。牆頭岑寂誰問。東風日暮無  
聊賴。吹得胭脂成粉。君細認。花共酒。古來二字天猶吝。年光去迅。謾  
綠葉成陰。青苔滿地。做取異時恨。

又 次晁无咎。

李文溪

敞茅亭。茂林環翠。苔磯低蘸烟浦。青葭混入漁家社。斜日斷橋船聚。  
眞樂處。坐芳草。瓦尊濁酒頻頻注。皋禽自舞。慣松徑衝雲。梅村踏雪。  
朗笑自來去。乘車墜。爭似修筇穩步。前塵回首俱誤。安閒得在中  
年好。抱甕尙堪蔬圃。高眼覷。算不識。人間寵辱除巢許。風篁解語。應  
共笑羣狙。無端喜怒。三四記朝暮。

又

葉直庵 闡

倚薰風。畫闌亭午。采蓮柔艣如語。紅裙濺水鴛鴦濕。幾度雲朝雨暮。

遊冶處。最好是。小橋芳樹尋幽趣。繡簾低護。任涼入霜紈。月侵冰簟。長夏等閒度。都如夢。悵望遊仙舊侶。遺踪今在何許。愁予渺渺瀟湘浦。檻竹空敲朱戶。黯無緒。念多情。文園曾草長門賦。酒酣自舞。笑滿袖。緇塵數莖霜鬢。羞殺照溪鷺。

摸魚兒

重過西湖

張梅深

樂

又吳塵暗。斑吟袖。西湖深處能浣。晴雲片片平波影。飛趁棹歌聲遠。回首喚。髣髴記。春風共載斜陽岸。輕攜分短。悵柳密藏橋。烟濃斷。逕隔水。話音換。思量遍。前度高陽酒伴。離踪悲事何限。雙峯塔塔露書空。穎情共暮鴉盤轉。歸興懶。悄不似。留眠水國蓮香畔。燈簾暈滿。正蠹帙逢迎。沉煤半冷。風雨閉宵館。

又登嚴州西樓

柴秋堂

望

望長江。幾分秋色。三分渾在烟雨。傷心已怕江南樹。那更暮蟬如語。

帆且駐。許說看羊裘釣雪。今何許。魚鰕自舞。但一舸蘆花。數聲羌笛。鷗鷺自來去。年年恨。流水朝朝暮暮。天涯長歎。飄聚衾寒不轉。鈞天夢。樓外難歌白紵。君莫訴。君試按秦箏。未必如鐘呂。鄉心最苦。算只有娟娟馬頭皓月。今夜照歸路。

桂枝香

前人

今宵月色。歎暗水流花。年事非昨。蕭灑江南似畫。舞楓飄柞。誰家又唱江南曲。一番聽。一番離索。孤鴻飛去。殘霞落盡。怨深難託。又腸斷丁香畫雀。記牡丹時候。歸燕簾幙。夢裏襄王。想念王孫飄泊。如今雪上蕭蕭鬢。更相思。連夜花發。柘枝猶在。春風那似。舊時宋玉。

八聲甘州

陳月境

芰荷風滌面。恰麥秋。應倒著春衣。渡曉溪雲濕。日流塵脚。露濕蛛絲。調翼受風。雛燕弱。不解爭泥。襯琅玕錦院。竹外薔薇。立久闌干凭。

暖看行魚吹沫。波暈平池。薛痕斑礎石。漸雨熟梅時。傍短籬、成團粉蝶。掠野花、相逐口高低。忘言處。徽絃乍拂。流水先知。

永遇樂

爲張安國賦  
焦尾集不載

韓南澗

池館春歸。簾櫳晝靜。清漏移箭。山下孤城。水邊翠竹。鶻鳩聲千轉。□□□。綺窗人去。尙有唾茸遺線。照珠筵、歌檀舞扇。寂寞舊家排遍。青雲賦客。多情多病。西掖桐陰滿院。飛絮隨風。馬頭月在。翡翠帷空捲。平湖烟遠。斜橋雨暗。欲寄短書雙燕。算猶憶、蘭房畫燭。醉時共剪。

滿庭芳

此詞宛有淮海風味。惜不名世。

劉吉甫

頌

鶯老梅黃。水寒烟淡。斷香誰與添溫。寶缸初上。花影伴芳尊。細細輕簾半捲。憑闌對、山色黃昏。人千里。小樓幽草。何處夢王孫。十年羈旅興。舟前水驛。馬上烟村。記小亭香墨。題恨猶存。幾夜江湖舊夢。空

凄怨多少銷魂。歸鴉被角聲驚起。微雨暗重門。

塞翁吟

千里和清真詞一集可取者僅此耳

方千里

暮色催更鼓。庭戶月影隴。記舊迹。玉樓東。看枕上芙蓉。雲屏幾幅。江南畫。香篆燼。煖烟空。睡起處。繡衾重。尚殘酒潮紅。忡忡。從分散。歌稀宴少。懷麗質。渾如夢中。苦寂寞。離情萬緒。似秋後。怯雨芭蕉。不展愁封。何時細語。此夕相思。曾對西風。

意難忘

和清真韻

求用之

官額塗黃。怕牋凝怨墨。酒漬離觴。紅樓春寄夢。青瑣夕生香。花氣暖。柳陰涼。棹曲水滄浪。愛弄嬌。臨流梳洗。顧影低相。桃花結子成雙。縱題紅去後。枉誤劉郎。琴心挑別恨。鶯羽學新妝。千萬恨。惱愁腸。便憔悴何妨。待共伊。平消別後。幾度風光。平消二字疑誤

青玉案

無名氏

年年社日停針線。怎忍見雙飛燕。今日江城春已半。一身猶在，亂山深處，寂寞溪橋畔。春衫著破誰針線。點點行行淚痕滿。落日解鞍芳草岸。花無人戴，酒無人勸，睡也無人管。

又和方回

姚志道

三年枕上吳中路。遣黃耳隨君去。若過吳江呼小渡。莫驚鷗鷺，四橋都是，老子經行處。朝川圖上看春暮。長憶高人右丞句。作個歸期天未許。春衫猶是，小蠻針線，曾濕西湖雨。

見東坡詞云和賀方回韻送伯固歸吳中

風入松

康伯可

又附田中行集

一宵風雨送春歸。綠暗紅稀。畫樓盡日馮闌意，與誰同撚花枝。門外薔薇開也，枝頭梅子酸時。玉人應是數歸期。翠斂愁眉。塞鴻不到雙魚遠，恨樓前流水難西。新恨欲題紅葉，東風滿院花飛。

祝英臺近

史邦鄉

柳枝愁。桃葉恨。前事怕重記。紅藥開時。新夢又溱洧。此情老去須休。  
春風多事。便老去。越難迴避。阻幽會。應念偷剪酴醾。柔條暗縈繫。  
節物移人。春暮更顛顛。可堪竹院題詩。薛堦聽雨。寸心外。安愁無地。

採桑子

朱野逸 藻

障泥油壁人歸後。滿院花陰。樓影沈沈。中有傷春一片心。閑穿綠  
樹尋梅子。斜日籠明。團扇風輕。一徑楊花不避人。

玉樓春

梅

劉隨如 鎮

泠泠水向橋東去。漠漠雲歸溪上住。疎風澹月有來時。流水行雲無  
覓處。佳人獨立相思苦。薄袖欺寒脩竹暮。白頭空負雪邊香。著意  
問春春不語。

柳梢青

施芸隱 樞

飛露初霜。冷侵金井。響到銀床。懊恨碧梧。不留一葉。月上紗窗。雁



聲做盡淒涼。又陡頓、衾寒夜長。曲曲屏山。重重客夢。無限思量。

菩薩蠻

李草堂 億

畫樓酒醒春心悄。殘月悠悠芳夢曉。嬌汗浸低鬟。屏山雲雨闌。香車河漢路。又是恁恁去。鸞扇護明妝。含情看綠楊。

阮郎歸

王花洲

同祖與之。

一簾疎雨細於塵。春寒愁殺人。桐花庭院近清明。新烟浮舊城。尋蝶夢。怯鶯聲。柳絲如妾情。丙丁帖子畫教成。妝臺求晚晴。

謁金門

趙竹潭

浦夫

天色晚。雲外一箏斜雁。獨凭闌干秋滿眼。菊花寒尙淺。葉落香溝紅泛。懶把新詩題怨。何處笛聲三弄斷。月遲簾未捲。

朝中措

吳夢臆

晚妝慵理瑞雲盤。針線傍燈前。燕子不歸簾捲。海棠一夜孤眠。踏

青人散。遺鈿滿路。雨打秋千。尚有落花寒在。綠楊未褪春綿。

南鄉子

孫花翁

璧月小紅樓。聽得吹簫憶舊遊。霜冷闌干天似水。揚州。薄倖聲名總是愁。  
塵暗鷓鴣裘。針線曾勞玉指柔。一夢覺來三十載。休休。空爲梅花白了頭。

踏莎行

陳芸厓 璧

江闊天低。樓高思迥。春烟蘸淡如秋景。今年芳草去年愁。分明又報明年信。  
燕子還來。歸期未定。可堪醉夢紅塵境。世間萬事儘消磨。水流不盡青山影。

又

王萬之

柳外寒輕。水邊亭小。昨朝燕子歸來了。天涯無數舊愁根。東風種得成芳草。  
亭畔秋千。當時歡笑。香肌不滿和衣抱。那堪別後更思量。

春來瘦得知多少。

又

錢若洲 口孫

征雁雲深。亂蛩寒淺。驚心怕見年華晚。蕭疎隄柳不禁霜。江梅瘦影清相伴。舞暗香茵。歌闌團扇。月明夢遶天涯遠。斷腸人在畫樓中。東風不放珠簾捲。

菩薩蠻

利碧澗

玉闌干外重簾晚。流雲欲度長天遠。花草不知名。春來各自春。綠鞞遊冶客。何處垂楊陌。不信不歸來。海棠花又開。

又

劉叔擬 仙倫招山

秦樓去了東風伴。一川烟草無人管。芳徑雨初晴。黃鸝三兩聲。海棠已謝。春事無多也。只有牡丹時。知他歸未歸。

好事近

趙立之

人去綠屏閑。逗曉柳絲風急。簾外杏花微雨。買春紅愁濕。單衣催  
賜麴塵羅。中酒病無力。應是繡床慵困。倚秋千斜立。

又

小枕夢催閑。飛雨時鳴高屋。掛起西窗人靜。聽春禽聲續。鴨塘溪  
綠漲輕痕。烟柳媚新綠。誰伴瘦筇尊酒。弄崑泉飛瀑。

清平樂

程楚客

曳雲搖玉。裙蹙秋綃幅。學得琵琶依約熟。貪按鴈沙新曲。曲終滿  
院春閑。清顰移上眉山。心事怕人猜破。折花背插雲鬟。

小重山

全前

香減鮫綃添淚痕。綵雲長是恨。等閑心。玉笙猶記夜深聞。湘水杳。寂  
寞隔巫雲。翠被冷重熏。做成歸夢了。却銷魂。垂楊濃處著朱門。依  
然是。風雨掩黃昏。

菩薩蠻

曾蒼山 原一

淡黃斜日留汀草。簷低半露遙岑小。病眼不禁愁。闌干無數秋。鴈聲何處落。舊夢還驚覺。風重葛衣單。深山吹笛寒。

眼兒媚

黃東浦 簡

畫樓瀕水翠梧陰。清夜理瑤琴。打窗風雨，逼簾烟月，種種關心。當時不道春無價。幽夢費重尋。難忘最是，鮫綃暈滿，蟬錦香沉。當

四字令

劉改之

情高意真。眉長鬢青。小樓明月調箏。寫春風數聲。思君憶君。魂牽夢縈。翠銷香煖雲屏。更那堪酒醒。

如夢令

謝無逸

門外落花流水。日暝杜鵑聲碎。蕃馬小屏風。一枕畫堂春睡。如醉。如醉。正是困人天氣。

又

王聖與

妾似春蠶抽縷。君似箏弦移柱。無語結同心。滿地落花飛絮。歸去。歸去。遙指亂雲遮處。

長相思

康伯可

南高峯。北高峯。一片湖光烟靄中。春來愁殺儂。郎意濃。妾意濃。油壁車輕郎馬驄。相逢九里松。

又

韓子晁

郎恩深。妾恩深。祇爲恩深便有今。回紋辜舊吟。雲沈沈。水沈沈。一點堅如百鍊金。郎應知妾心。

又

杜娘家。謝娘家。樓壓官橋柳半遮。簾波漾彩霞。拾飛花。怨飛花。望斷郎來日又斜。東風吹鬢鴉。

又

夜蕭蕭。夢蕭蕭。又趁楊花到謝橋。鳳沉明月簫。來迢迢。去迢迢。枉把吟牋寄寂寥。飛鴻不受招。

又

花深深。柳陰陰。度柳穿花覓信音。君心負妾心。怨鳴琴。恨孤衾。鈿誓釵盟何處尋。當初誰料今。

玉樓春

徐山民

螢飛月裏無光色。波水不搖樓影直。每憐宿粉浣啼痕。懶把舊書觀字跡。枯荷露重時聞滴。君夢不來誰阻隔。妾身不畏浙江風。飛去飛來方瞬息。

又

李冰壺 子酉

紗窗春睡朦朧著。相見尙懷相別惡。夢隨城上角聲殘。淚逐樓前花

片落。東風不解吹愁却。明月幾番乖後約。當時惟恐不多情。今日情多無處著。

又

利碧澗

夾簾不捲重堂暮。白騎少年何處去。雲根穉藕已勝花。烟外子松今作樹。金梯月澁知無與。寶瑟風驚猶自語。斜河一道界相思。橫隔天心寒似霧。

又

陳雲厓

瓊奴家與章臺並。路遠可憐歸夢近。被頭浪語臉紅潮。鏡面頻思眉翠暈。年年花月年年病。花月無情人有恨。欲將此恨寄湘流。又恐湘流流不盡。



# 陽春白雪卷第六

六州歌頭

桃花  
焦尾集不載

韓南澗

東風著意。先上小桃枝。紅粉膩。嬌如醉。倚朱扉。記年時。隱映新妝面。臨水岸。春將半。雲日暖。斜橋轉。夾城西。草軟莎平。跋馬垂楊渡。玉勒爭嘶。認蛾眉凝笑。臉薄拂燕支。繡戶曾窺。恨依依。共攜手處。香如霧。紅隨步。怨春遲。銷瘦損。憑誰問。只花知。淚空垂。舊日堂前燕。和烟雨。又雙飛。人自老。春長好。夢佳期。前度劉郎。幾許風流地。花也應悲。但茫茫暮靄。目斷武陵溪。往事難追。

又謝人送牡丹

劉後村

維摩病起。兀坐等枯株。清晨裏。誰來問。是文殊。遣名姝。奪盡羣花色。浴才出。醒初解。千萬態。嬌無力。困相扶。絕代佳人。不入金張室。却訪

吾廬對茶鐺禪榻。笑殺此翁癡。珠髻金壺。始消渠。憶承平日。繁華事。修成譜。寫成圖。奇絕甚。歐公記。蔡公書。古來無。一自京華隔。問姚魏。竟何如。多應是。彩雲散。劫灰餘。野鹿銜將花去。休回首。河洛邱墟。漫傷春。弔古。夢繞漢唐都。歌罷欷歔。

摸魚兒

懷雲匡陳乘車  
東甯時游湘潭

譚明之

宣子  
在庵

掩朱弦。住聽金縷。天涯同是羈旅。多情記把香羅袖。殘粉半粘荆樹。還信否。便忍道。石臺暗寂春無主。分明閒阻。那睡鴨。噓雲翔鴛溜。月此際更休語。人閒世。誰識緘愁最苦。輕帆重解烟雨。而今翻笑周郎誤。挑剔寒缸尋譜。游倦處。果因甚。亭亭瘦影如前度。無由寄與。待謝却梅花。東風爲我。吹夢過淮浦。

又梅

趙景周

與洽  
慧庵

甚幽人。被花句引。庭皋遙夜來去。江空歲晚誰爲伴。只有瓊枝玉樹。

愁絕處。望萬里瑤臺。夢斷迷歸路。花還解語。更雪琢精神。冰相韻度。  
粉黛盡如土。飄仙袂。曾綴蕊珠鸞鷲。雲茵月障千步。莫教衣袖天  
香冷。恐怨美人遲暮。更起舞。任斗轉參橫。翠羽曾知否。塵緣自誤。終  
待驂鸞。乘風共去。長作此花主。

又

王與之同前  
花洲

記年時。荔枝香裏。深紅一片成陣。迎風浴露精神爽。誰似阿嬌丰韻。  
黃昏他詞俱  
是仄聲近。望翠幕珠席。粉面雲鬟映。嬌波微瞬。向燭影交相。歌  
聲閒繞。私語畫闌並。佳期事。好處天還慳吝。鶯啼燕語無定。一輪  
明月人千里。空夢雲溫雨潤。蕭郎病。恨天闊鴻稀。杳杳沈芳訊。日長  
人靜。但時把好山。學他媚態。偷就眉峯印。

又 瓊花

施與言

柳蒙茸。暗凌波路。烟霏慘淡平楚。七香車駐。貌環掩。遙認翠華雲母。

芳景暮。鴛鴦悄。銖衣來按飛瓊舞。淒涼洛浦。漸玉漏沈沈。清陰滿地。  
乘月步虛去。銷凝處。誰說平安小杜。翔螭聲斷簫鼓。情知禁苑酥  
塵沈。羞與倡紅同譜。春幾度。想依舊苔痕。長印唐昌土。風流千古。人  
在小江樓。朱簾半捲。香注玉壺露。

芙蓉月 夫容

趙虛齋

黃葉舞空碧。臨水處。照眼紅葩齊吐。柔情媚態。竚立西風如訴。遙想  
僊家城闕。十萬綠衣童女。雲縹緲。玉娉婷。隱隱彩鸞飛舞。尊前更  
風度。記天香國色。曾占春暮。依然好在。閑伴清霜涼露。一曲欄干。敲  
徧悄無語。空相顧。殘月澹。酒闌時。滿城鐘鼓。

三姝媚

此詞平仄與諸家不同。

杜子卿

花浮深岸樹。迎新曦窗影。細觸游塵。映葉青梅。記共折南枝。又及嘗  
新。駐屐危亭。烟墅香。風物撩人。虹外斜陽留晚。鶯邊落絮催春。心

事應辜桃葉。但自把新詩。徧寫脩筠。恨滿芳洲。倩晚風吹夢。暗逐江雲。慢撚輕攏。幽思切。清音誰聞。謾有鴛鴦結帶。雙垂繡巾。

夜合花

風葉敲窗。露蛩吟蛩。謝孃庭院秋宵。鳳屏半掩。釵花映燭。紅搖潤玉。暖膩雲嬌。染芳情。香透鮫綃。斷魂留夢。烟迷楚驛。月冷藍橋。誰念賣藥文簫。望仙城路杳。鶯燕迢迢。羅衫暗摺。蘭痕粉迹。都銷流水。遠亂花飄。苦相思。寬盡春腰。幾時重恁。玉驄過處。小袖輕招。

西牕燭

雨霽江行自度

譚明之

春江驟漲。曉陌微乾。斷雲和夢相逐。料應怪我頻來去。似千里迢遙。傷心極目。爲楚腰。慣舞東風。芳草萋萋。襯綠。燕飛獨。知是誰家簫聲多事。吹咽尋常怨曲。儘教衿袖香泥。旣君不見。揚州三生杜牧。待淚華。暗落銅盤。甚夜西窗翦燭。

大酺 牡丹

正綠陰濃。鶯聲懶。庭院寒輕烟薄。天然花富貴。逞天紅殷紫。疊葩重  
萼。醉豔酣春。妍姿浥露。翠羽輕明如削。檀心鴉翼嫩。似離情愁緒。萬  
絲交錯。更銀燭相輝。玉瓶微浸。宛然京洛。朝來風雨惡。怕孱憊。低  
張青油幕。便好倩佳人插帽。貴客傳箋。趁良辰。賞心行樂。四美難并  
也。須拚醉。莫辭杯酌。被花惱。情無著。長笛何處。一笑江頭高閣。極目  
水雲漠漠。

歸朝歌

趙白雲 僕宗

翠羽低飛簾半揭。寶簟牙牀涼似雪。窗虛雲母澹無風。隔牆花動黃  
昏月。玉釵鸞墜髮。盈盈白露侵羅襪。記逢迎。鴻驚燕婉。燈影弄明滅。  
蜀雨巫雲愁斷絕。羅帶同心留綰結。交枝紅豆雨中看。爲君滴盡  
相思血。染衣香未歇。夜闌天淨魂飛越。正銷凝。一庭秋意。烟水浸空

闌。

多麗 西湖

趙雲洞 時奚

斂吳雲。翠奩推上紅晴。渺澄流、鱗光寒碎。遠峯螺紺低凝。杏香引、畫船影溼。柳陰趁、驕馬蹄輕。橋限寬平。堤橫南北。去來人入繡圍行。漸際晚、梅妝游困。十里曳歌聲。蒼烟潤。飛鴉妬春。一夢催醒。認名園、當時宴幸。纜痕猶在危亭。露花濃、靜迎直砌。露蘚冷、淡護飛甍。幾對東風。留連麗景。年□□老越山青。夜深月照人依舊。何處最關情。歡情娛地。星移世換。客恨還盈。

滿庭芳 西湖宣

吳履齋

春水溶溶。春山漠漠。淡烟淺草輕籠。危樓闌檻。掠面小東風。又是飛花落絮。芳草暗、萬綠成叢。閑徙倚、百年人事。都在畫船中。故園無恙否。一谿翠竹。兩徑蒼松。更有魚堪釣。有秫堪舂。底事塵驅物役。空

回首社燕秋鴻。功名已。蕭蕭短鬢。分付與青銅。

滿江紅 滕王閣

全前

萬里西風吹我上。滕王高閣。正檻外。楚山雲漲。楚江濤作。何處征帆  
天末去。有時野鳥沙邊落。近簾鉤。暮雨捲空來。今猶昨。秋漸緊。添  
離索。天正遠。傷飄泊。歎十年心事。悠悠漠漠。歲月無多人易老。乾坤  
雖大愁難著。向黃昏。斷送客魂銷。城頭角。

揚州慢 瓊花

趙虛齋

十里春風二分明月。蕊仙飛下瓊樓。看冰花翦翦。擁碎玉成毬。想長  
日。雲階竚立。太真肌骨。飛燕風流。斂羣芳。清麗精神。都付揚州。雨  
窗數朶。夢驚回。天外香浮。似閨苑花神。憐人冷落。騎鶴來遊。爲問左  
淮風景。長空淡。烟水悠悠。又黃昏。羌管孤城。吹起新愁。

孤鸞

四明後園石峯之下。小池之上。有梅花。

黃玉泉



冰心孤寂。戀幾插靈峯。半泓寒碧。骨瘦和衣薄。清絕成愁極。蕭然滿身是雪。怕人知。鏡中消息。獨向百花夢外。自一家春色。記羅浮、幽夢渾如昔。有浸眼鯨波。倚雲丹壁。夜醉空山酒。叫裂橫霜笛。回頭洞天未曉。但迢迢、江南千驛。飲散東風。落月正海山浮碧。

### 宴清都

胡伯雨

翼龍泉

夢雨隨春遠。征衫薄、短篷猶逗寒淺。裁芳付葉。書愁沁壁。水隴竹院。別來被篝梅潤。暗塵積、舊題紈扇。許多時、閑了闌干。放得蘚痕青滿。誰念杜若還生。蘋花又綠。不堪重口。山程水記。茶經硯譜。共誰閑展。湖山舊曾遊遍。不怪得、近番心懶。恰今朝、水落洲平。江上楚帆風轉。

調本一百二字。此詞後段末句增二字。作六字一句。宋人無此填。

### 徵招

全前

蘋花又綠江南岸。賓鴻帶將寒去。幾許落梅愁。渺暗香何處。一春長

是雨。剩費却、翠篝沈炷。冷隔簾旌。潤銷牕紙。有人吟苦。燕壘漬芹香。畫堂永。關心去年情緒。愁壓曲屏深。更小山無數。濺裙前事誤。□□□□□□□□朱闌。不了銷凝。移損秦箏柱。

齊天樂 重游番禺

丁無隱

兩株烟柳荒城外。依依暮帆曾駐。小扇障塵。輕輿貼岸。誰料重行吟處。流光暗度。悵蘭渚。春移葦汀秋聚。可奈清愁。快呼艇子載將去。中年懷抱易感。甚風花水葉。猶似孤旅。伴鶴幽期。隨鶯樂事。還是情乖意負。衣塵帽土。但杜鏡堪羞。賀囊偏口。待報山靈。莫教雲壑妬。

祝英臺近

向莘老 希尹

曉簾攏。晴院宇。空鴨冷沈水。翠被欺寒。嬌困未忺起。厭厭兩點眉峯。一浪酒暈。正人在。溫柔鄉裏。甚情味。羞對釵燕箏鴻。胭脂暗彈淚。欲寫吳箋。無處問雙鯉。倩他輕薄楊花。與愁結伴。直吹到。那人根底。

二郎神

西施沉沙磧

周伯弼

浪花皺石。颭夜月。欲移還定。想白苧烘晴。黃蕉攤雨。人整斜巾照領。剪斷鮫綃。何人續。黯夢想。秋江風冷。空露漬藻鋪。雲根苔蝨。指痕環影。重省。五湖萬里。誰問烟艇。料寶像塵侵。玉瓢珠鎖。羞對菱花故鏡。頷略鴉黃。破除螺黛。都付渚蘋汀荇。春醉醒。暮雨朝雲。何處柳蹊花徑。

綺寮怨

官人斜弔古

石正倫

瑤林

綠野春濃停騎。暖風飄醉襟。漸觸目。景物淒悲。花無語。曲徑沈沈。重檐繚垣靜鎖。丹青暗。斷軸塵半侵。歎絳紗玉臂封時。何期掩。夜泉流恨深。已矣霜凋蕙心。蘭昌舊事。雲容好信難尋。竚立孤吟。怕鳳履。有遺音。今宵珮環奏月。知倦客。苦登臨。驚飛翠禽。松杉弄碎影。晴又陰。

側犯

譚明之 宣子

素秋漸爽。倚香曲枕情依舊。懷袖浸、數尺湘漪。簾紋皺。悲歡盡、夢裏玉骨從消瘦。空又思、太液芙蓉未央柳。翔鳳何在。樂府傳孤奏。人病酒。有鴛鴦雙字情誰繡。拜月西樓。幾聲滴漏。應恐紈潔已疎郎手。

春聲碎

南浦送別  
自度腔

前人

津館貯輕寒。脈脈離情如水。東風不管。垂楊無力。惣雨顰烟寐。一作賦闌干外。怕春燕掠天。疏鼓疊。春聲碎。劉郎易憔悴。况是懨懨病起。蠻牋漫展。便寫就、新詞情誰寄。當此際。渾似夢峽啼湘。一寸相思千里。一作寸相思一

八聲甘州

鄭南谷 夢鶴

大江流日夜。客心愁、不禁晚來風。把英雄口氣、興衰餘事、吹散無蹤。但有山圍故國、依舊夕陽中。直北神州路、幾點飛鴻。欲問周郎赤壁。

壁。歎沙沈斷戟。烟鎖艤。聽波聲如語。空亂荻花叢。甚雲閒、平安信少。到黃昏、偏映落霞紅。尊鱸美。扁舟歸去。相伴漁翁。

又

送翁時可  
如宛陵

陸雲西

景思

問纏腰跨鶴事如何。人生最風流。怕江邊潮汐。世閒歧路。只是離愁。白馬青衫往事。贏得鬢先秋。目送紅橋晚。幾番行舟。蘭珮空餘。依黯。便南風吹水。人也難留。但從今別後。我亦似浮漚。敬亭上、半牀琴月。記彈將、寒影落南州。秋聲裏。塞鴻來後。爲爾登樓。

又

孤山寒食

羅澗谷

甚匆匆歲月。又人家插柳。記清明。正南北高峯。山傳笑響。水泛簫聲。吹散樓臺烟雨。鶯語碎春晴。何地無芳草。惟此青青。誰筦孤山山下。任種梅月冷。薦菊泉清。看人情如此。沈醉不須醒。問何時、樊川歸去。歎故鄉、七十五長亭。君知否。澗雲溪竹。笑我飄零。

又

胡蒙泉

甚年年心事占秋多。芳洲亂蕪生。正小山已桂，東籬又菊，秋爲人清。  
腸斷洞庭葉下，倚西風，誰可寄芳蘅。娟娟愁予處，欲醉還醒。爲問  
素娥飲否。自謫仙去後，知與誰明。耿盈盈如此，分影落瑤觥。步高臺、  
夜深人靜，有飛仙，同跨海山鯨。歸來也，遠游歌罷，失却秋聲。前段第七句上  
多倚西風三字與諸家詞不同。

八六子

鄭幼霞熏初小山

憶南洲。紺波縈繞，垂楊翠拂朱樓。念十載風流夢覺，滿身花影人扶。  
舊曾暗遊。無言空愴離憂。醉袖裏將紅淚，吟牋寫許清愁。試與問  
楊瓊，解憐郎否。也應還是舊家聲價，而今豔質不來眼底，柔情終在  
心頭。黯凝眸。黃昏月沈半鉤。

瑣窗寒

重遊東湖起句第一字諸家俱用仄聲

蘇才叔

雲浦蒼寒。烟堤冪翠。舊痕新漲。春愁十里。冉冉碧絲搖蕩。記登臨、少年思豪。唾壺擊玉歌清壯。到如今夢裏。秋風鴻陣。晚波漁唱。惆悵重來處。望畫舫天邊。纒絲原上。山陰秀句。付與一聲雲響。正東湖、誰家柳下。午陰漠漠。人蕩槳。最堪憐。白髮周郎。爲江山自賞。

桂枝香

徐鼎夫

西麓

人閒秋至。對暮雨滿城。沈思如水。桐葉驚風似語。怨蛩齊起。南樓月冷。曾多恨。怕而今。夜深橫吹。那堪更聽。蕭蕭槭槭。透窗搖睡。問楚夢、閑雲何地。但手約輕綃。省人深意。紅樹池塘。誰見宿妝凝睇。舊時裘馬行歌事。合都歸、汀蘋烟芷。思王漸老。休爲明璫。沈吟洛渚。

華胥引

丁無隱

書梅

論交眉語。惜別心啼。費情不少。蕙渺溱期。蘋深汜約。輕誤了。幾度金鑄相思。又燕歸鴻杳。誰料如今。被鶯閑占春早。頻把愁句。惜鷗雲。

嬌紅猶遠。渾拚如夢。爭奈枕醒屏曉。欲寄芙蓉香半握。怕不禁秋惱。  
重是親逢片帆。雙度天杪。後段第五句七字。較宋詞多一字。

漢宮春

趙雲洞

時笑

霜皎千林。正石橋人靜。春滿橫塘。寒花自開自落。曉色昏黃。明沙暗  
草。對東風。深鎖閑堂。金漏短。江南路遠。夢回雲冷瀟湘。重到舊時  
花下。按玉笙歌徹。月正西廊。亭亭愛伊素影。粉薄新妝。經年瘦損。漫  
誰知。心事淒涼。休更聽。城頭畫角。一聲聲斷人腸。

東風第一枝

探梅

黃玉泉

迅影彫年。嫩晴蕢煖。意行問訊春色。不知春在誰家。闖香幔攏玉勒。  
一枝竹外。似欲訴、經年相憶。奈情多難翦。愁來寂寞。水寒烟碧。吟  
正好。悲笳喚恨。酒正殢。夕陽催客。殷勤片月飛來。更隨暗香細索。橫  
斜瘦影。看盡未開時消息。爲春來。還怕春多。腸斷夜闌霜笛。



渡江雲 和清真

蕭鶴皋 元文體仁

流蘇垂翠幃。高低一色。紅紫等泥沙。香山居士老。柳枝桃葉。飛梗屬誰家。好音過耳。任啼鳥。怨入芳華。心情懶。筆牀吟卷。醉墨戲翻鴉。堪嗟。雕弓快馬。敕勒追蹤。向夕陽坡下。休更憶。青絲絡轡。紅袖裁紗。司空見慣。渾如夢。笑幾回。索葦吹葭。山中樂。從渠恣賞鶯花。

慶清朝

木夫容。詞俱押平韻。

李敏軒 宏模。希膺。

碧玉雲深。彤綃霧薄。芳叢亂迷秋渚。重城傍水。中有吹簫儔侶。應是瓊樓夜冷。月明誰伴乘鸞女。仙遊處。翠帟障塵。紅綺隨步。別岸玉容竚倚。愛淺抹蜂黃。淡籠紈素。嬌羞未語。脈脈悲烟泣露。綵扇何人妙筆。丹青招得花魂住。歌聲暮。夢入錦江。香口歸路。

小重山

曾蒼山 原一子實。

薄雪初消。銀月單。疎疎浮竹影。矮紅闌。梅花夢事。落孤山。禁人處。霜

重鼓聲寒。留取曉來看。斑簾低小閣。燭花殘。一帆明月去滄灣。空相憶。雪浪月痕翻。

又

黃乙山鑄亦顏

涼入秋檐雨意長。竹深啼絡緯。響虛堂。一枝燈影耿昏黃。疎簾外。風度木樨香。心事易成傷。燕支坡下路。語如簧。口仙螺子玉釵梁。鴛屏夢。應到舊章郎。

又

陳伯可成之

恨入眉尖鬢不開。日高猶未肯。傍妝臺。玉郎嘶騎不歸來。梁閒燕。猶自及時回。粉淚污香腮。纖腰成瘦損。有人猜。一春那識下香堦。春又去。花落滿蒼苔。

點絳脣

宋蘭室自道吉甫

山雨初晴。餘寒猶在東風軟。滿庭苔蘚。青子無人見。好客不來門

外芳菲徧。難消遣。流鶯聲轉。坐看芭蕉展。

又

蘇竹里

茂才叔

竹翠藏烟。杏紅流水歸何處。透簾穿戶。更灑黃昏雨。

織錦題書。誰

寄愁情去。渾無緒。綠楊千縷。不似真眉嫵。

又

朱堯章

瑛

繡被鴛鴦。寶香熏透薔薇水。枕邊一紙。明月人千里。

宿酒初醒。全

不忒梳洗。擡纖指。微籤玉齒。百色思量起。

戀繡衾

趙參晦

汝光

柳絲空有千萬條。繫不住。溪頭畫橈。想今宵也對新月。過輕寒。何處  
小橋。玉簫臺榭春多少。溜啼紅。臉霞未消。怪別來。胭脂慵傅。被東  
風偷在杏梢。

又

蕭大山

山則

倚闌閑看燕定巢。舊彈箏，因病久拋。畫不盡，殘眉黛。被東風，吹在柳梢。曉來暗理傷春曲。把金釵、枕畔細敲。書寄與，天涯去。并相思，紅淚一包。

又梅

趙白雲

江烟如霧水滿汀。早梅花，偏占淺清。倚翠竹，寒無力。想瀟湘，斜日暮雲。幾回夢斷陽春面。問百花，猶隔幾塵。趁月夜，霜風峭。約綵鸞，同載玉笙。

又

趙雲洞

迢迢江路日又曛。爲春遲，長是怨春。小立馬，千林下。寄寒香，歸贈故人。相逢細說經年恨。早匆匆，吹散霽雲。算惆悵，芳菲事。粉蝶知，應自斷魂。

又

全前

江南烟水幾萬重。記玉人、花底舊容。待欲寄、飛鴻信。望前山、夕照冷紅。塞笳月下聲淒楚。怨百花、春事夢空。倩誰共、東君說。把陽和、分付朔風。

伊州三臺令

楊東窗韶父季和

水村月淡雲低。爲愛寒香晚吹。瘦馬立多時。是誰家、竚舍竹籬。三三兩兩芳蕤未放。瓊鋪雪堆。只這一些兒。勝東風、千枝萬枝。

烏夜啼

潘紫崑庭珪

無端小雪廉纖。入平簷。金鴨旋添龍餅、莫開簾。尋梅約。開還落。可曾收。合作一年春恨、上眉尖。

又

題月海星天觀地。卽宋武所居故地。

鄭幼霞薰初

春江一望微茫。辨梳檣。無限青青麥裏、菜花黃。今古恨。登臨淚。幾斜陽。不是寄奴住處也、淒涼。

拋毬樂

李子我

肩吾

風冒蕙紅雨易晴。病花中酒過清明。綺窗幽夢亂於柳。羅袖淚痕凝似錫。冷地思量著。春色三停早二停。

如夢令

王師錫

竹上一樓嵐翠。竹下一渠春水。中有隱人居。破屋數間而已。無事。無事。靜夜月明千里。

又

楊季和

涼月薄陰猶殢。紅豆一枝秋思。門外幾重山。山外行人千里。歸未。歸未。又是菊花天氣。

醉太平

徐叔柔

夢龍

冰肌玉容。情真意濃。小樓幾度春風。醉琉璃酒鐘。關山萬里。何時又逢。思量雨蹟雲蹤。似襄王夢中。

憶王孫

趙君舉

日長高柳一蟬聲。翡翠簾深寶簾清。夢遠春雲不散情。曉風輕。玉棟  
花飛宿雨晴。

楊柳枝

前人

浙浙西風生暮寒。繡衣單。碧梧葉落藕花殘。恨前歡。月鏤虛樞烟  
逗竹。夢千山。玉簫清夜憶孤鸞。鎖長閑。

昭君怨

楊誠齋

昨夢扁舟花底。香滿西湖烟水。急雨打篷聲。夢初驚。却是池荷跳  
雨。散了眞珠還聚。聚作水銀渦。瀉清波。

長相思

孫肖之

雲一窩。玉一梭。淡淡春衫薄薄羅。輕鬟雙黛蛾。風聲多。雨聲和。窗  
外芭蕉三兩窠。夜長人奈何。

又

譚明之

去路遙。歸路遙。燈月光中立小橋。魂縈紫玉簫。  
風蕭蕭。雨蕭蕭。此  
夜相思空寂寥。梅花落麗譙。

又

前人

淨亭亭。步盈盈。蟬影明綃傳體輕。水邊無限情。  
翠尊傾。翠鬟傾。歸  
去如何睡得成。西風吹酒醒。

又

楊季和 韶父

溪水清。溪水渾。溪上人家數畝園。垂楊深閉門。  
青羅裙。白羅裙。採  
盡青蘩到白蘋。江南三月春。

望江南

陳東甫

芳思遠。南苑惜春時。翠柳枝柔金笛怨。碧桃花老玉笙悲。風日正遲  
遲。



又

趙君舉

新夢斷。久立暗傷春。柳下月如花。下月今年人憶去年人。往事夢中身。

又

趙行可

石時行洞

霜月溼。人睡矮篷秋。驚覺夜深兒女夢。漁歌風起白蘋洲。別岸又潮頭。

謁金門

曾子實

梅粉褪。點點雨聲春恨。半吐桃花芳意嫩。草痕青寸寸。把酒花邊低問。莫解寒深紅損。等待春風晴得穩。琵琶重整頓。

又

譚明之

銀漏滴。午夜平康巷陌。雙掩獸環人語寂。餘香無處覓。回首舊遊蹤跡。紺碧染衣猶溼。一晌沈吟誰會得。月明春店笛。

又

人病酒。生怕日高催繡。昨夜翻新花樣瘦。旋描雙蝶。湊。閑凭繡牀呵手。却說春愁還又。門外東風吹綻柳。海棠花。斲句。

菩薩蠻

趙君舉

閑庭草色侵階綠。瑣窗午夢人如玉。拋枕出羅幃。風吹金縷衣。怨春風雨惡。二月桃花落。雨後縱多晴。花休春不成。

又

蕭體仁

斷紅流水香難覓。行雲一去無蹤跡。楊柳漫遮闌。閑愁付遠山。玉箏彈未了。倚柱人空老。青子摘來酸。酸心有幾般。

又

郭□□

賣錫天氣簫聲軟。午院水沈烟未斷。睡起補殘眉。紅綿入鏡遲。霎時開笑靨。花上看雙蝶。新月上簾鉤。相思不斷頭。

浣溪沙

周伯弼

撲撲精神的的香。茶蘼一朵曉來妝。雛鶯葉底學官商。著意勸人須盡醉。扶頭中酒又何妨。綠窗花影日偏長。

又

黃同武時龍野橋

雨歇花梢月正明。映簾人靜繡燈昏。鴛鴦成字便停針。笑啓玉奩明酒暈。緩尋金葉熨香心。一春情緒此時深。

又過高郵

譚明之

欲展吳牋詠杜娘。爲停楚棹覓秦郎。藕花三十六湖香。珠顆翠繁饒宿淚。玉痕紅褪怯晨妝。小橋風月思淒涼。

又

王敬子大簡

拂面涼生酒半醒。廉纖小雨晚初晴。過雲無定月虧盈。庭戶不關春悄悄。闌干倚遍夜深深。幾回風竹誤人聽。

又

落日蒸紅山欲燒。短筇行藥過山腰。松聲隱隱晚來潮。  
矮樹依崑

曾子隆

原隆  
月風

又

趙退齋

笑摘青梅傍綺疏。數枝花影漾前除。太湖石畔看金魚。  
笋指曉寒  
慵出袖。翠鬟春懶不成梳。爲君縫狹繡羅襦。

搗練子

無名氏

偏口戲。最風流。斗帳金猊暖不收。一陣蜜蜂狂絮裏。  
酒酣眠折玉搔  
頭。

又

初酒醒。乍衣單。褪著裙兒側著冠。門外小橋寒食夜。  
月明人去杏花  
殘。

樓心月

此調譜中不載。

柳下爭挈畫槳搖。水痕不覺透紅綃。月明相顧羞歸去。都坐池頭合鳳簫。

又

手把新荷葉一枝。喚來池上只愁歸。流螢裏在紅紗袖。忽到持盃箇箇飛。

又

新著生紅小舞衣。案前磨墨誤淋漓。含嗔逗晚不梳洗。背面牙牀喫荔枝。

